

La nuvena di Natali

La nuvena di Natali

Misa a centru di la chiazza
la nuvena di Natali
ni ricorda a tutti quanti
'n-fattu anticu e universali.

E li granni e picciriddi,
tra lu friddu ca si mori,
fanu fila ppi vardari
ccu gran fidi 'nta lu cori.

'Nta novena cù la grutta
ccu lu voi e u sciccareddu,
Maria e San Giuseppi
e lu Santu Bammineddu.

Ci sù ponti, ciumi e chiani
fimmineddi a lu tilaru,
pastureddi, li Re Magi
e frummentu 'nto pagghiaru.

Ci su lova 'nta panaru,
c'è cu sona ha ciaramedda,
c'è furmaggiu, caciù e tuma
e ricotta 'nta fascedda.

'Na cometa ca fa lustru
guida a tutti 'nta la grutta;
si solleva un-duci cantu
mentri c'è cu ammutta ammutta.

Tra la fudda 'nta la chiazza
e li tanti cosi beddi
c'è la calia e lu turruni,
li nuciddi e li crispiddi.

Ci su tanti cristiani,
ccu la fidi ca privali,
misi attornu a la novena
ca fisteggianu u Natali.

di Alfio Naso